

## Boetapele ba Bohlanka



---

### SABATHA MANTSIBOEA

#### Bakeng sa thuto ea beke ena, Bala:

1 Pet. 5:1–10, Liketso 6:1–6, Jer. 10:21, Matt. 20:24–28, Liprov. 3:34, Tšen. 12:7–9.

#### Temana ea Khopolo:

“Lahlalang lipelaelo tsohle tsa lōna holim’a oona; hobane oa le hlokomela” (1 Petrose 5:7).

**B**oithuto ba likereke tse holang hangata kamehla bo tiisa bohlokoa ba boetapele bo hloahloa. Boetapele bona bo nka pono ea bona ho Molimo le lentsoe la hae le ho fa motho e mong le e mong monyetla kahara phutheho ho sebelisa lineo tsa bona tsa moea ntšetso peleng ea thomo ea evangeli. Empa boetapele ba kereke bo qholotsa haholo. Baithaopi, bao hangata ba fanang ka nako ea bona leha ba se ntse ba phathahane, haholo ba tsamaisa kereke. Litho li “kheha ka maoto a tsona” ka ho khaotsa ho tla kerekeng haeba ho etsahala ntho eo ba sa e tšehetseng. Ho feta moo, moetapele ea hloahloa oa kereke hape o lokela ho teba semoeeng. ‘Me ha rea lokela ho lebala hore Petrose o ngolla likereke tse tobaneng le lithoriso. Moetapele oa kereke o tlokotsing ka linako tseo. Ke mang joale, ea hlahlleloang bakeng sa mosebetsi oo?

Ho 1 Petrose 5:1–10, Petrose o bua ka taba ea boetapele boemong ba kereke ea lehae. Litemaneng tsena, o ngola ka limelo tse hlokolosi tse hlokehang e seng feela boetapeleng ba lehae, empa ho litho, hape. Mantsoe a hae a re loketse le ha joale joalo ka ha a ne a loketse le ka nako eo.

*\*Bala thutoea beka ena ho lokisetsa Sabatha, Motšeanong 13.*

## Baholo Kerekeng ea Pele

Sheba litemana tse latelang: Liketso 6:1–6, 14:23, 15:6, 1 Tim. 5:17, 1 Pet. 5:2.

**Litemana** tsee li re fa leseli lefe malebana le liqholotso tse neng li tobile kereke ea pele le mosebetsi oa baetapele ba teng?

---



---



---

Sehophla se sehlo se bang balumeli le ho kena kereke ke tlhohonolofatso e tsoang ho Molimo. Empa, joalo ka ha maiphihlelo a Bakreste ba pele a bontšitse, khaphatseho ea kholo e ka tlisa mathata. Ka mohlala, Liketso 1–5 e tlaleha tataiso ea moea o halalelang le tšokoloho ea Bakreste ba bangata. Liketso 6:1–6 e bontša litholoana: sehlopha se ile sa ba sehlo ho feta boetapele ba sona, 'me bo ne bo hloka ho beha meralo e le ho laola tšebetso ea letsatsi ka leng ea kereke.

Taba e tlisitseng bofokoli bona sehlohlolong tlhophisong ea kereke e bile tletlebo ea khethollo.sehlopha sa ba-Gerike sa tletleba ka hore bahlolohali ba teng ba ne ba sekisetsoa kabong ea lijo ea letsatsi ka leng. E le karabelo, sehlopha sa batho, batikone, se ile sa khetheloa ho thusa baapostola ba leshome le metso le metso e 'meli ka taolo ea lisebelisoa tsa kereke.

Ke 'nete hore kereke ea pele e ne e tsamaisoa ke Moea o Halalelang ka tsela e khethehileng. Empa le moo ho ne ho ntse ho na e tlhokahalo ea ho thea tsamaiso ea kereke. Sehlopha se seng se bohlokoa se neng se hlokahala kerekeng eo ea pele e ne e le baholo, ba neng ba beoa kerekeng e 'ngoe le e 'ngoe ea lehae. Ha e le hantle, khetho ea baholo ho etella pele lihlopha tsena tse hlophisitsoeng tsa Bakreste e ne e le ntho eo Paulose le Barnabae ba neng ba e etsa ha ba ntse ba tsamaea le libaka tse neng li hloka ho utloa ka Jesu (Liketso 14:23).

Baholo ba ne ba fuoa mesebetsi e fapaneng Bokresteng ba pele. Joalo ka baetapele ba mahae a bona, nako le nako ba ne ba sebetsa e le barupeli ho ruta ba bacha ba sokolohang. Ba ne ba ruta, le ho netefatsa hore lintho tse hlokahalang li ea etsoa molemong oa sechaba (Liketso 15:6, 1 Tim. 5:17, 1 Pet. 5:2).

**Ke litsela life tseo u ka ithutang ho sebetsa hantle le baetapele kerekeng ea hau ea lehae, leha le sa lumellane kamehla linthong?**

## Baholo

**Bala 1 Petrose 5:1–4. Ke maitšoaro afe ao baetapele ba lokelang ho atlisa tšebetsong ea bona ka kerekeng? Ke joang metho ee a ka sebetsang ho e mong oa rōna, ho sa natsoe tšebetso ea rōna?**

Petrose o qala taelo tsa hae ho baholo ka ho sheba hore eena ka bo eena ke moholo 'moho le bona. E be joale o hlahisa lintho tse peli ka eena: ke paki ea mahlomola a Krete, 'me o lebelletse ho nka karolo khanyeng e tla senoloa. Ka ho rialo, Petrose o hloaea limelo tsa pele tse lokeloang ho fumanoa ho moholo: moholo o lokela ho utloisisa bohlokoa ba seo Krete a se utloetseng bohloko molemong oa rōna le tšepo e kholo eo a re fang eona.

Petrose tšoantša mosebetsi oa moholo le oa molisa ea hlokotseng mohlape oa Molimo. Papiso ea hae ea kereke le linku e re, joalo ka linku, litho ka linako tse ling li ka kheloha ka bo tsona. Ka hona, ba hloka molisa ho ba tataisetsa sehlopheng hape le ho ba thusa ho sebetsa hantle le bona. Moholo hape o lokela ho sebetsa e le mohlala oa boikokobetso oa hore na Mokreste o lokela ho itšoara joang.

**Ke tlhokomeliso efe eo re e fumanang mo bakeng sa bao e leng balisa? Jer. 10:21, Ezek.34:8–10, Sak. 11:17.**

Tšebetso e bohlokoa ea boetapele ba Bokreste ke ho sebetsa le batho ka kerekeng ka mamello eohle ea molisa ha a sebetsa le linku. Baholo ba lokela ka bonolo ba li tlise 'moho khumamelong ho arolelana molaetsa oa Jesu le ba hlokang ho mo tseba le pholoho e fumanoang ho eena.

Petrose hape o bona hore baholo ba lokela ho lisa le ho sheba ka boithaopo e seng ka ho qobelloa. Kamehla ha ho bonolo ho fumana batho ba ithaopelang ho nka qholotso ea ho etella pele kerekeng. Se se totobala haholo nakong ea likhetho. Hore kereke e tle e sebetsa hantle, ho na le likheo tse 'maloa tse ikhethang tse hlokang ho tlatsoa. Ho na le mabaka a etsang hore batho ba bangata ba be leqe ho nka tšebetso ea boetapele. E meng ea mesebetsi ena e hloka nako e ngata, 'me batho ba loketseng mesebetsi e joalo e ka 'na eaba ba se ntse ba na le mesebetsi e mengata. Ba bang ba ka ikutloa e ka ha loka ho lekana ho nka mesebetsi. Empa lentsoe la Petrose ke hore haeba re koptjoo, re lokela ho amohela ka thabo boetapele haeba e le ntho e ka khonehang ka hohle.

## Boetapele ba Bohlanka

**Bala 1 Petrose 5:3 le Mattheu 20:24–28. Ke metheo efe ea boetapele ba Bokreste e fumanoang litemaneng tsee?**

---



---



---

Ka se-Gerike, lentsoe la sehloho ho 1 Petrose 5:3 ke katakurieuoentes. Lentsoe le tšoanang hape le fumanoa ho Mattheu 20:25 'me le bolela ho “sebelisa matla” kapa ho “busa” holima e mong. Ka hona, taello ho baholo e fanoeng ho 1 Petrose 5:3 le ka tolokoa e le, “E seng ka ho busa mehlape ea lōna ka thata”, le ho senola mantsoe a Jesu ho Mattheu 20:25.

Matthew 20:20–23 e fana ka boemo bakeng sa mantsoe a Jesu ho Mattheu 20:24–28. 'Me oa Jakobo le Johanne o ne a ile a atamela Jesu ka kopo ea hore, ha Jesu a tla 'usong oa hae, mora e mong a lule ka letsohong la hae le letona e mong ka ho le letšehali.

“Jesu a ba utloela bohloko, a se ke a nyatsa boikhantšo ba bona ka ho kopa ho phahama ho feta baena 'moho le bona. O ile a bala lipeo tsa bona, o tseba botebo ba khokahano ea bona le eena. Lerato la bona ha se feela khahleho ea botho; leha le silafalitsoe ke mocha oa lona oa botho, ke khaphatseho e tsoang mohloling oa hae o pholosang. A ke ke a nyatsa, empa o tla tebisa le ho hloekisa.”—Ellen G. White, *The Desire of Ages*, p. 548.

Jesu a hlalosa hore boemo boo ba tlhompho ke bo fanoang ke Ntate, e seng eena. Empa ha a tsoela pele ho hlalosa hore phapano ea bohlokoa lipakeng tsa puso ea hae le ea Balichaba ke mofuta oa moetapele ea tla hlaha 'musong oa hae. Bao ba lakatsang ho etella pele 'musong oa Jesu e leng Morena e lokela ho ba bahlanka hobane baetapele 'musong oa Jesu ba tla ba joalo ka eena. “Joalo ka Mor'a motho, ea sa kang a tlela ho sebeletsoa, empa e le ho sebeletsa le ho neela bophelo ba hae ho ba topollo ea ba bangata’ ” (Matt. 20:28).

Ka hona, Petrose o memela baetapele ba kereke khopolong e tšoanang: boinehelo le boitatolo bo bonoang ho Jesu bo lokela ho bonoa ho bona.

**Bala Ba-Filipi 2:4–8. Ke joang seo Paulose a se bolelang mona se lumellanang le seo Petrose a se ngotseng? Ka ho fetisa, ke joang re ka etsang lintho tseo re li bilelitsoeng litemaneng tsee?**

## Ho Apesoa ka Boikokobetso

Sechaba se ne se le lihlopha mehleng ea lefatše leo Petrose a neng a phela ho lona. Ba busang ba ne ba le seo kajeno se ka bitsoang “boteng bo laolang.” Ho ba shalima, e ne e le lihlopha tsa ba maemo a tlasana, ’me maemo a tlase ka ho fetisisa e ne e le a lekhoba. Boikokobetso e ne e le boemo bo loketseng ba katlase boemong ho ba holimonyana ho bona. Lentsoe la se-Gerike bakeng sa boikokobetso le na le moelelo oa ho ba “tlase,” “ho se bonahale,” “ho fokola,” le “bofuma.” Le hlalosa batho ba se nang maemo le matla sechabeng. Lefatšeng le kantle ho bosolomané le Bokreste, lentsoe boikokobetso le ne le amahanngoa le ba boemo bo tlase, ’me ho etsa ka boikokobetso hone hosa khothaletsoe ho batho feela.

**Bala 1 Petrose 5:5–7. Ho shebiloe boemo le nako eo ba phetseng ho eona, ke eng e hlollang ka seo Petrose a se ngotseng moo?**

Ka Bibeleng, boikokobetso bo bonoa ka leihlo le fapaneng le ka moo bo neng bo bonoa kateng nakong le moetlong oo Petrose a neng phela ho tsona. Petrose o qotsa Maele 3:34 ho tsoa. Testamenteng ea khale ea se-Gerike, temana eo hape e qotsang ho Jakobo 4:6. Testamenteng ea Khale, karolo ea mosebetsi oa Molimo nalaneng ke ho kokobetsa ba phahameng le ba matla (Esa. 13:11, 23:9, Jobo 40:11). Boemo bo lokelang ba motho ho Molimo ke ba boikokobetso. “Joale, le ikokobetse ka tlasa letsoho le matla la Molimo, ele hore a tla le phahamise ka nako e lokelang” (1 Pet. 5:6. Boikokobetso, ho e na le boikhohomoso, bo lokela ho bontša likamano tsa Bokreste, e seng fela le Molimo empa le motho ka mong (1 Pet. 5:5). Bakreste, le baetapele ba Bokreste, ba hlakomela hore ke baetsalibe ba bolohehang ka mohau oa Molimo. Karolong ena e bohlokoa, joale, bohle rea lekana, ’me kapela sefapano re lokela bohle ho ikokobetsa. ’Me boikokobetso bona bo lokela ho senoloa ke likamano tsa rōna le ba bang, haholo holima bao re nang le matla holima bona. Ruri, motho e mong le emong a ka kokobela ka pele ho Molimo, ’mopi oa leholimo le lefatše. Hape, ho batla ho le bonolo ho ikokobetsa ka pele ho ba leng ka holimo ho rōna, ba nang le matla holima rōna, le ba “holimo” boemong moo re leng teng. Teko ea ’nete e tla ha re senola boikokobetso ho ba ka “tlase” ho rōna, ba senang matla holima rōna. Ke mofuta oa boikokobetso oo Petrose a buang ka oona mona.

**Ke eng ka sefapano le seo se se emelang se lokelang ho re thusa ho lula re kokobetse?**

## Joalo ka Tau e Purumang

Joalo kaha re bone, Petrose o ngotse khahlanong le litlhoriso. Taba ea khohlano e kholo e ne e se ntho e hole le babali ba hae; ba ne ba na le maiphihlelo a eona ka tsela eo boholo ba rōna re so kang re ba le oona, bonyane ha joale.

**Bala 1** Petrose 5:8–10 le Tšenolo 12:7–9. **Litemana tsee li re ruta eng ka qaleho ea bokhopo le mosebetsi oa Satane lefatšeng la rōna?**

---

Buka ea Tšenolo e senola hore Bakreste ba nka karolo ntoeng e khahlanong le matla a botle le a bokhopo. Ho Tšenolo, matla a botle a eteletsoe pele ke Jesu, eo eleng lentsoe la Molimo, Morena oa marena le 'Musi oa babusi (Tšen. 19:13, 16). Matla a lefifi a eteletsoe pele ke Diabolosi, eo hape a bitsoang Satane le dragone (Tšen. 12:7–9; 20:7, 8). Leha bophatlalatsi le Bakreste ba bang ba latola boteng ba Satane, taba e tiileng ke hore diabolosi ke sebopuo se matla se nang le merero e mebe feela ka rōna. Empa litaba tse molemo ke hore Diabolosi o tla felisoa qetellong (Tšen. 20:9, 10). Petrose ha a fifatse kotsi eo Dabolosi a e emetseng. Diabolosi o joalo ka tau e rorang e batlang bohle bao e ka ba harolang (1 Pet. 5:8). Petrose supa hape hore, babali ba hae ba ka bona matla a diabolosi lihlorehong tse ba tobileng. Leha, lihlorehong tseo li tla fella khanyeng e sa feleng (1 Pet. 5:10).

**Bala 1** Petrose 5:10 hape. **Petrose o reng ho rōna mo?**

---

Leha re sa tsebe semelo sa liteko tsa bona, seo re ka se bonang ke tšepo eo Petrose a e hlalolang. E, diabolosi ke ntho ea sebele. Ntoa ke ea sebele, le mahlomola a rōna ke a sebele. Empa “Molimo oa mehauhelo eohle” o hlotse Diabolosi. Joale sohle se re hlorisang, ha re ka lula re tšepahetse-le ho isa lefung (sheba Ba-Heb. 11:13–16)—tlholo e tiisitsoe, re leboha Jesu.

**Ke joang re ka ithutang ho mamella ka tumelo, le ho isa qetellong, ho sa tsotellehe hore na ho tla eng tseleng tsa rōna?**

---



---

## Ho Ithuta Haholoanyane:

Mohlala o moholo oa boetapele ba bohlanga ba Jesu bo fumanoa boitšoarong ba hae Selallong. Ka nako eo, Jesu o ne a tseba hantle hore na ke mang (Mora oa Molimo) le hore o ne a se a tla khutlela ho Ntate oa hae (Johanne 13:1). Ka mora lijo a hlatsoa maoto a barutuo ba hae. Eaba o re, “Me joale, ekare ha ’na, ke leng Morena le Moruti, ke hlatsoitse maoto a lōna, le lōna le tšoanetse ho hlatsoana maoto. Hobane ke le beets mohlala, hore le etse joalo ka ha ke le entse” (Johanne 13:14, 15). Nako eohle ha balateli ba Jesu ba hlatsoana maoto, ha phete feela ketsahalo ena; ba hopotsana hore ho ba moetapele ’musong oa Jesu, motho o lokela ho ba mohlana. Ha ho tika-tiko, bophelo ba bona bohle, haholo kamora ho utloisisa hantle hore na Jesu e ne e le mang, barutuo ba hopola ketsahalo ena ea boikokobetso karolong ea mong’a bona. Ha ho potang hape, ho ne ho le kelellong ea Petrose ha a ne a memela baholo ba kereke hore ba se ke ba busa mohlape oa bona ka thata empa ho “ikapesa ka boikokobetso.” “Ka ho lumela ho ba motho, Krete o bonahalitse boikokobetso boo e leng setsoto sa leholimo. Ketso ea ho lumela ho ba motho e ne e ke ke eaba ho kokobetsoa ha e ne e se ka ketso ea ho phahama ha Krete ka tlhaho. Re lokela ho bula kutloisiso ea rōna ho hlokomela hore Krete o beheletse ka thoko kobo ea hae ea Borena, moqhaka oa hae oa borena, taelo ea hae e phahameng, le ho apesa bomolimo ba hae ka botho, hore a tle a fihlele motho moo a teng, le ho tlisetsa lelapa la batho matla a ho ba bara le barali ba Molimo. “Bonolo le boikokobetso tseo ebileng lintlha bophelong ba Kresre li tla bonahatsoa bophelo le limelong tsa ba ‘tsamaeang joalo ka ha a tsamaile.’” —Ellen G. White, *Sons and Daughters of God*, p. 81.

## Ho Ithuta Haholoanyane:

1. Jesu o qalile bosebeletsi ba hae ka ho qholotsa Diabolosi. A fokolisitsoe ke matsatsi a mashome a mane a ho itima lijo, o ile a khona ho hanela liteko tsa Diabolosi ka ho qotsa mangolo (Matt. 4:1–11; Mark 1:12, 13; Luka 4:1–13). Sena se re bolella eng ka moo le rōna, re ka hanelang Diabolosi maphelong a rōna?
2. Ke mehlala efe eo u e boneng ea seo e ka bang mehlala ea boikokobetso ho ba bang? Ke eng eo u ka ithutang eona mehlaleng eo?
3. Ka sehlopheng, arabang potso ena: Ntle le seo Petrose a se rutileng litemaneng tsa beke ena, ke lintho life tse etsang boetapele bo botle ba Bokreste? Ke joang lintho teo li ka amanang le lintho tse ntle boetapelng ba kante? Li ka fapana joang?
4. U ka araba joang taba ea hore Satane ha se ntho ea sebele empa e le setšoantšo feela sa bokhopo bo fumanoang mothong?

